

Jose Neves Samalarua

Nudár Eis komisáriu KAK ita-boot hili dalam atu sai husi Komisáriu KAK hodi sai hanesan kandidatu PR ba eleisaun ida ne'e. Ha'u hakarak atu husu, saida mak sai hanesan motivasaun prinsipál husi kandidatu rasik hodi kandidatu an ba eleisaun ida ne'e?

Obrigado ba pergunta. Primeiru servisu lubuk ida ne'ebé ha'u hala'o iha setór públiku, ba kria ha'u nia persepsaun ida ba situaun lubuk ida iha governasaun. hahú husi servisu ho juventude ikus liu ha'u servisu iha komisaun anti korrupsaun ne'ebé nia papél hanesan órgaun estadu ida tau matan ba kombat korrupsaun.

Iha knar ida ne'e, liga ho funsionamentu institucional, instituisaun estadu nian lubuk ida. preokupasaun ida ne'e halo ha'u sente katak servisu iha KAK ha'u nia kontribuisaun la másimu. KAK nudár órgaun estadu ida ne'ebé nia kompeténsia limitadu. Presiza mós atensaun ba kombat korrupsaun la'ós komisaun de'it. Maibé presiza estadu tomak halo esforsu maka'as

Inklui PR?

PR, Governu, parlamentu, sosiedade sivil, lubuk ida tau papél hamutuk mak bele kombat korrupsaun. Laiha ezemplu ida iha mundu hatudu katak órgaun ida kombat korrupsaun iha estadu ida. Maibé, asaun kolektivu hosi (estadu/adversáriu?) tomak. Ne'e primeiru kestaun.

Segunda kestaun mak lideransa estadu ida ne'e tenke kontinua. Ita hare daudauk katak ita nia lider sira lubuk ida hahú husi 75, idade avansadu ba beibeik ba beibeik. Estadu iha idade ida sei ki'ik. Ita tenke barani hakat ba asumu responsabilidade ida ne'e.

Tanba ne'e mak ha'u foti liafuan rua ne'ebé hanesan ha'u nia moto hanesan ha'u nia lema "Korajen no Prontidaun". Ita la iha korajen, ita la pronto.

Karik ita bele halo kle'an liu tan atu bele ajuda ita nia adeptu sira atu bele komprende liu tan loloos se mak samala rua. i tanba sá mak Samala Rua hakarak kompete iha eleisaun ida ne'e?

Agora temi naran samala rua, ita liga ba rezisténsia. Kuakér kombatente ida iha libertasaun uza naran, iha uitoan mak uza naran kódigu. Mas kuandu temi naran kódigu la signifika katak ita foti naran ne'e hanesan priviléjju. Maibé preokupasaun agora ba oin, mak oinsá ita sira mai husi rezisténsia atu halo buat di'ak ba povu.

Emas dehan katak Samala Rua akontese hafoin Lasama hetan kapturasaun. Iha istória ida relasaun ho ida ne'e?

Iha relasaun. Ha'u sei iha Timor ha'u uza kódigu Anin. Ba to'o iha Java, sei nafatin, to'o momentu kuandu Lasama Kapturadu.

Ami halibur hamutuk fali atu reorganiza fali movimentu klandestina iha Java tanba kapturasaun ba LASAMA no kompanheru lubuk ida afeta dezmantelamentu ba rede klandestina iha Indonézia.

Entaun ami halibur malu para atu reorganiza fali. Altura ami reorganiza malu, kompanheru lubuk ida konvense ha'u atu lidera komité permanente ida atu hala'o servisu lubuk ida enkuantu sekretáriu jerál RENETIL nian iha hela prizaun.

Entaun ha'u ho konsiderasaun ba estatutu RENETIL katak Sekretáriu Jerál mantén nafatin, entaun ha'u troka naran ne'e fila kontráriu, husi oin ba fali kotuk. Lasama nian ha'u troka de'it Samala Rua tanba mantén servisu ho segunda pessoa. Emas ida ne'ebé mak asume fali kargu ida enkuantu Lasama iha hela kadeia laran.

Ne'ebé iha ligasaun ba istóriku, iha ligasa ba ho funsaun do servisu klandestina nian iha tempu ida ne'ebá.

Kompaneru Samala Rua, tanba sá mak kompanheriu samala rua avansa ho independente, maske Samala rua rasik bele la'ó ho partidu polítiku ida ka ou bele ba organizasaun rezisténsia ida. Tanba sá Samala Rua hili dalan hodi sai independente i diferente liu kompara ho kandidatu sira seluk ne'ebé hakarak ba avansa ho partidu polítiku?

Lei fó dalan ba kandidatu Prezidente ne'e independente. Tanba Prezidente ne'e supra partidaria, nia aas liu partidu, par tau matan ba partidu. Lei fó dalan ba ida ne'e.

Segundu, ha'u la ativu iha kualkér partidu polítiku, la tama iha estrutura iha kualkér partidu polítiku ida. Ha'u nia partidu mak vota, vota hotu, ne'e hotu ona.

Tanba ho razaun sira hanesan ne'e mak hodi kandidatu ba Prezidente dalan nakloke ba ha'u. Independente, ha'u utiliza dalan ida mekanizmu legal ne'ebé maka estadu kria tiha ona.

Prezidente rasik labele halo servisu barak tanba nia tenke iha servisu tuir kompeténsia rasik ne'ebé konstituisaun disidi. Ha'u hakarak atu husu ba kandidatu Prezidente, Saida loloos mak sei sai hanesan Prioridade Prinsipál ba Kompaneru samala rua durante tinan lima ba oin?

Primeiru ha'u korize uitoan, Prezidente la'ós servisu la barak. Prezidente nia servisu importante, i boot. Nia Podér ezekutivu uitoan de'it, maibé kompeténsia boot.

Tanba Chefe Estadu, Garante Funsionamentu estadu atu atinje objetivu sira estadu nia, buat kona-ba unidade estadu, independénsia nasionál, garante funsionamentu regular instituisoens demokratikas, Komandante supremu, ne'e servisu uitoan hela maibé boot.

Ida ne'ebé mak sei sai hanesan prioridade prinsipál?

Ha'u foti kestaun boot tolu iha nee. Ha'u nia preokupasaun ba karik PR. primeiru Boa governasaun. Boa Governasaun determinante ba funsionamentu estadu tomak. Boa Governasaun liga hotu iha setór hotu hotu.

Pilares do estadu hotu hotu. Governu, Prezidente, parlamentu, setór judisiariu, tribunais hotu hotu tenke kumpri tuir prinsipi boa governasaun. Boa governasaun iha aspetu lubuk ida iha laran, polítika, lei, prosedimentu, funsionamentu, transparénsia, utilizaun rekursus estadu nian, no utilizaun apropiadu finansas públiku.

Segunda preokupasaun kona-ba ema. maibé ha'u foka liu ba juventude foin sae. Ita nia sosiedade ida ne'e, sosiedade ida ne'ebé dinamiku.

Sosiedade nee rasik nia komponente juventude nee boot liu. entaun komponente ida boot ne' forsa estadu nian, forsa ba dezenvolvimentu, forsa ba seguransa, forsa ba estabilidade.

Mudansa lubuk ida liu husi juventude. Ita nia prosesu polítiku hahú iha 75 hahú ho joven. Ita nia maun sira ne'e uluk joven. Ho jovens sira ita bele halo mudansa.

Estadu independente ona, preokupasaun ba juventude ne'e inegadu. Katak ema ida labele nega nia, presiza fó atensaun maka'as, kria kondisoens, mas reforsa (rekursu) juventude atu espresa nia potensias.

Ita iha potensia, mas kondisaun la permite nune'e potensia la atualiza. Atualiza ho kondisaun ida. presiza ida nee. Kuandu atualiza ona, estadu bele hetan benefisiu boot husi ida ne'ebá.

Iha ona buat balun la'o. Polítika juventude, maibé implementasaun ida be apropriadu, loloos ba situasaun joven nian ne'e balun haree seidauk kona. Seidauk kona tanba ita foti medidas barak ne'ebé juventude sei sai marjinalijadu iha aspetu balun.

Alein de rekursu umanu, ida seluk, prioridade seluk?

Ikus liu, terseiru, família, uma kain. família nudár abut. nudár sélula. nudár fini sosiedade ida ne'e. La iha sosiedade ida ke la konstroe husi uma kain. Sosiedade hotu hotu moris husi uma kain.

Iha uma kain ida mak inan, aman oan. Husi inan aman oan mak hahoris ema ba tan ba tan forma comunidade ida ki'ik liu iha baze to'o agora bolu aldeia, aldeia ba suco, suco ba postu, postu ba munisípiu, munisípiu ba nasional.

Oinsá samalarua bele introduz dezenvolvimentu família iha ninia programa, tanba ita hare didi'ak programa dezenvolvimentu ekonomia no sosiál ne'e iha governu nia knar. Oinsá ita boot bele introduz ida ne'e ho governu?

Prezidente la halo programa espesífiku ba kestaun todo (tomak). Prezidente lidera estado, governu halo buat ne'e. Governu tau atensaun ida nee Prezidente bolu atensaun ba boa governasaun, Prezidente bolu atensaun ba juventude, Prezidente bolu atensaun ba iha Governu.

Saida mak meus ida di'ak liu ne'ebé Samala Rua sei foti atu bele halo governu hodi rona Prezidente ninia lian?

Komunikasaun polítika ne'e presiza, atu nune'e órgaun estado hirak ne'e funsional ba tomak estado ida ne'e. Komunikasaun polítika para atu bele fó hanoin ba malu. Pois ita nia estado ne'e estabelese sistema ida ke entre pilares sira ne'e iha "power sharing", ita nia parlamentu kontrola Prezidente, kontrola governu.

Konstituisaun defini tiha ona separasaun de poder entre órgaun estado sira. nudár PR bainhira eleitu saida mak Prezidente Samala Rua sei halo atu nune'e bele garante atu iha check and balance entre órgaun estado sira?

Leitura ba artigu ida ne'e tenke kompletu. Separasaun i interdependensia. Separa maibé sira halo komunikasaun ba malu.

Ne'e be separasaun de poder ne'e para kada órgaun estado ida idak ninia kompeténsia ne'ebé mak lei fó hala'o tuir kompeténsia, labele interven, ka labele hetan intervensia husi órgaun sira seluk ba iha funsaun espesífiku ne'ebé mak ita nian.

Maibé komunikasaun entre sira, tanba alein de temi separasaun, temi mós interdependensia. Estado harii ho forsas ka pilares estado haat ne'e. i komunikasaun ne'e importante para atu bele garante nafatin kestaun be interdependensia ne'e.

i iha parte seluk poder, lei hatete, konstituisaun hatete ona kada órgaun tenke funsiona tuir kompeténsia ne'ebé mak lei haruka. Agora PR nia knaar ida hatete iha ne'ebá, garante funcionamentu regular institusoens demokratikas. Ne'e signifika, liafuan garante ne'e rasik ativu.

Lia fuan ne'e hatudu katak nia tenke halo asaun ruma polítiku ou jurídiku para hodi garante katak órgaun do soberania funsiona. PR nudár guarda ba konstituisaun.

Nia kuandu asume kargu, halo juramentu atu kumpri ho konstituisaun ida ne'e. Ne'ebé nee atu garante mós prinsípiu ida ohin ha'u temi. Prinsípiu separasaun, no interdependensia, funcionamentu órgaun estado sira.

Maibé iha esperiénsia, daudaun PR atuál uainhira foti sujestaun? dala ruma bele kria fali polimika ne'ebé governu bele konsidera hanesan atake polítika ou hanesan opozisaun ba governu. Saida mak PR Samala Rua atu asegura katak sujestaun opiniaun hosi PR la'ós atake polítika maibé hanesan konstrusaun polítika?

Tenke defini uluk ita nia interese nasional nee saida. Interese nasional ne'ebé Prezidente, Parlamentu, no Governu konkorda. Se ita nia interese nasional ida mak kombate korrupsaun, Kuandu Prezidente hare governu funsiona la di'ak, tenke ko'alia, mas ko'alia ho didi'ak.

Prezidente nia knaar ida hanesan arbitu. Kuandu ema ruma, jogus, ema ruma joga sala, nia ha'u apitu fó sinál: Primeiru, Segundu, Kartaun , ultimu kartaun. Prezidente dala ruma foti asaun ida ne'e tanba nia kompeténsia. Tanba ne'e, ita tenke konkorda katak prinsipiu boa governasaun ne'e atu Kontra korrupsaun, kontra abuzu poder boa governasaun, kontra konflitu interese. Prezidente tenke ko'alia.

La'ós segredu ba públiku katak kazu korrupsaun balun ne'ebé Samala Rua hanesan adjuntu komisaun KAK lori ba iha tribunal. Uainhira Samala Rua lori kazu ne'e reprezenta KAK iha mós diskusaun ne'ebé kria dezentendementu ka deskonkordansia ho desizaun ida ne'e. Buat ne'e posivel, bele akontese bainhira Samala Rua sai hanesan PR uainhira ita boot foti desizaun ou sujere ba governu. Ha'u atu husu hela, tanba sá mak iha KAK, Samala Rua Barani tebetebes hodi lori kazu kontra membru governu sira? Saida mak halo Samala Rua barani tebes?

Primeiru, kompeténsia ne'ebé mak lei fó ba KAK atu funsiona, la'ós ha'u mak halo. mai hosi Governu, mai hosi Parlamentu, lei para kria, forma instituisaun ida fó kompeténsia fiar órgaun (polísia/liu hosi?) Kriminál espesializadu atu kombate korrupsaun hare atu bele investiga bele, hare atu bele kaer ema, bele halo medidas ko-asaun seluk kumpri...

Nudár PR ita boot sei fó forsa ba KAK atu halo knaar hanesan ne'e nafatin i kontinua luta?

Presiza reforsa KAK nia funsionamentu, presiza reforsa órgaun sira seluk ne'ebé mak ezije servisu hamutuk, KAK atu labele servisu mesak. Presiza halo servisu hamutuk ho ministériu públiku, tribunal, órgaun estadu sira seluk, polísia, kooperasaun institucional kestaun ida ne'ebé ke iha ita ninia estadu.

Tanba ema dala ruma, lori ninia karáktek pesoál, ba hatuur fali iha karáktek instituisaun nian. Entaun impede funsionamentu estadu nian. Ita nia karáktek pesoál nee tenke haketak hosi karáktek instituisaun nian. Instituisaun lubuk ida fó dalan ba servisu hamutuk.

Tanba ne'e mak problema iha KAK, la'ós KAK de'it, maibé sira seluk ne'e hotu. Maibé ha'u servisu iha KAK ne'e, ami la'ós ha'u mesak, ami lubuk ida. Koletivu, ami servisu hamutuk. Too foti medidas balun ne'e tanba lei mak fó kompeténsia ba ami. La boot maibé kompeténsia naton ne'ebé mak iha, ita uza didi'ak, ne'e mós halo mudansa.

Kompeténsia ne'e la'ós to'o iha KAK de'it. Lori karáktek sira hosi Ministériu públiku, tribunal, sociedade sivíl, Iha lubuk ida. Tanba ne'e mak ita fó uitoan hanoin di'ak harii took kombate korrupsaun nian.

Daudauk ne'e Timor-Leste sai hanesan estadu soberanu. Nudár Prezidente ba nasaun soberania ida ne'e. Timor-Leste nia liña fronteira marítima seidauk iha. Ita mós seidauk iha fronteira marítima, no rai ho indonézia. Nudár PR oinsá PR bele asegura katak ita nia soberania metin, katak rai pedasuk ka tasi pedasus husi ita nian labele lakon. Saida mak ita sei halo atu bele asegura soberania ida ne'e?

Kestaun ida mak liga ho ita nia polítika esterna. Agora divizaun fronteira marítima ho fronteira terrestre nian la'ós kestaun relasoens bilateral de'it, maibé ita nia polítika esterna tenke konkorda katak fronteira marítima sai preokupasaun nasionál.

Maibé estadu bainhira atu defini fronteira presiza mós ita iha polítika esterna ne'ebé mak iha definisaun klaru. Ita iha polítika esterna ho Australia ne'e presiza difinisaun.

Maibé difinisaun fronteira marítima ninia rezultadu ikus mak tenke fó benefísiu ba estadu atu utiliza ita nia rekursus kompletu. Ita nia independénsia nasionál ho fronteira ida ne'ebé permanente.

Fronteira permanente ita sei prosesu hela. Maibé presiza polítika esterna ida ne'ebé ke estadu tomak konkorda para atu bele reforsa esforsu estadu ne'ebé mak forte no soberanu. Esforsu polítika diplomátika ne'e mós presiza maka'as tebes atu bele tenta atinje fronteira terrestre entre Timor-Leste ho Indonézia.

Ho Australia, saida mak samala rua sei halo relasional ho fronteira marítima?

Prezidente da Repúblika ba kestaun ida ne'e servisu hanesan servidor. Kestaun mak, la'ós prezidente mesak maka atua, prezidente, governu no órgaun supreme. i Prezidente maka ezekuta polítika jerál estadu nian, tanba ne'e mak prezidente tenke akompaña prosesu ne'e too iha iha nivel saida depois tuir fali komisaun saida mak tenke kria para bele permite estadu tomak ho servisu hamutuk para bele atinje hodi defini delimitasaun fronteira marítima no terestre Timor-Leste nian.

Agora daudaun maun boot XANANA Gusmão lidera prosesu negosiasaun Fronteira marítima ne'e. ita hatene tinan kotuk movimentu ativista ka movimentu popular ezije ba governu Australia atu mai negosia ho vontade di'ak ka sadere ba prinsípiu tribunal internasionál ka mekanizmu internasionál nudár prezidente da repúblika saida mak ita boot nia opiniaun rasik atu bele ajuda timor hanesan rai ki'ik ida bele iha soberania hanesan mós ho rai sira seluk.

preokupasaun boot ne'e iha intendimentu hanesan entre pilar sira ne'e hotu. agora asaun negosiasaun ne'e iha sensibilidade ke iha buat balu ke ita presiza hatene.

Sensibilidade polítika diplomátika la fasil ba ema públiku atu asesu maibé saida mak ita bele halo hanesan sidadaun ho asaun sira. Ita nia prinsípiu negosiasaun ne'e atu bele iha definisaun bazeia ba direitu internasionál, direitu internasionál mak bele fó solusaun

Prezidente samalarua sei apoiu mekanizmu internasionál rasik?

ne'e mak dalan definisaun ba mekanizmu internasionál

Relatóriu Chega foin daudauk ne'e fó rekomendasaun lubuk entre relatóriu hirak ne'e fó rekomendasaun katak comunidade internasionál, Timor-Leste, indonézia tenke harii tribunal ida ne'ebé kredível hodi bele julga autór kriminozu sira ne'ebé komete ba krime graves durante okupasaun indonézia iha Timor-Leste, nudár prezidente da repúblika, saida mak ita boot sei halo atu bele sai hanesan ema ida ne'ebé hamriik iha oin lori ideia no aspirasaun vítima sira ka povu Timor-Leste ne'ebé durante 24 anus hetan opresaun husi militar indonézia? saida mak ita boot sei halo ba vítima sira?

Primeiru, prezidente nia medidas ka nia formas atu halo tenke liga kedas ho ninia funsaun. funsaun prezidente atu garante estadu garante independénsia nasionál ida ne'e tenke sai preokupasaun báziku agora atu kria mekanizmu ida para atu lori autór sira ba responsabiliza asaun ne'ebé mak akontese durante okupasaun ne'e.

Presiza mós polítika esterna di'ak entre timor ho indonézia. Porque prosesu legal bele la'o mas kondisiona ho medidas polítika balun ne'ebé ke país rua ne'e tenke komunika ba malu ho di'ak. Tanba nee estadu ho estadu.

Agora se ita nia estadu la halo komunikasaun polítika di'ak, ita la iha polítika estadu ne'ebé espesífiku ho indonézia, para atu bele garante parte rua tenke konkorda atu estabelese mekanizmu ida atu bele lori autór sira ne'e atu ba responsabiliza, legalmente ultimu (tribunal ne'e bele halo).

Mai ha'u, primeiru, hahú ho relasaun polítika di'ak ho indonézia. Se to'o ikus Indonesia dehan ita nia relasaun ne'e di'ak, husu sira atu bele atinje mekanizmu ida di'ak. Ne'ebé relasaun polítika ne'e hanesan kondisaun ida para lori país rua ne'e atu to'o ikus konkorda para kria mekanizmu ida ne'e.

Se ita la konkorda mós la bele. agora atu konkorda, ita hili dalan saida para ita bele estabelese relasaun di'ak ho Indonézia, para bele iha momentu oportunos saida mak bele país rua ne'e atu konkorda ho nia mekanizmu.

Emá barak dehan hanesan ne'e katak violasaun direitus umanus iha Timor-Leste ne'e mós la sees hosi impunidade ne'ebé iha. Se karik ita labele julga ka lori autór sira ba tribunal sei kria presedente at ida ba mundu. Iha parte seluk bele kontinua halo violasaun. I karik iha Timor mós, ho situasaun polisia ka militar mós, ita haree katak violasaun ne'e la'ós buat ida sala, ita halo krime ita la tama komarka. Saida mak samala rua hanoin atu nune'e bele evita buat hirak ne'e labele akontese iha Timor?

Bele sai presedente, bele mós lae presedente. Tanba sá mak komete krime barak liu ita. Depende oinsá mak estadu kria kondisaun para atu forma ita nia military. Forma ho kapasidade funu de'it ka forma ho kapasidade siviku.

Ho respetus ba prinsípios báziku relasaun ema nian. Tanba militar, ha'u hanoin la iha tendénsia forte atu ba. Tanba ita ho país ki'ik, ita la presiza ho militar ida armadu modernizadu, ne'ebé tenke fó formasaun ba militar sira ne'ebé mak tenke iha funsaun sosiál ho funsaun umanitariu nian.

Tenke responsive ba kondisaun sosiál?

funsauñ Sosiál tanba la iha sentidu ba ita atu forma militar ho kapasidade militar as. Tanba ameasa sira atu mai husi li'ur ne'e ita sei la responde.

Nudár PR ka komandante supremu das forças armadas, oinsá Samala Rua iha polítika di'ak atu bele introduz ka desenvolve forças armadas sira mais profesional. Tanba atu halo forças armadas ida ne'ebé bele responsive ba kondisaun sosiál presiza kria kapasitasaun lubuk. Saida mak samala rua hanesan komandante supremu sei halo atu bele ajuda sira atu desenvolve?.

Primeiru ita nia interese saida mak presiza seguru liu ita. Ita nia interese fronteira ka, ita nia rikezas naturais lubuk ida ka, saida?.

Interese Timor Leste nian mak fó dalan mai ita atu ita dehan ita presiza militar ida para atu defende interese sira ne'e, husi aspetu militar.

Mais segundu, maka interese ne'e hetan ameasa husi ne'ebé?, husi Australia ka, husi kualkér país ida ka husi ne'ebé?. Mas se husi país viziñu ruma ita iha kapasidade atu halo resposta militar hasoru ameasas hosi ita nia viziñu ka?.

Ne'ebé primeiru interese. segundu ameasa ne'e nia forma ne'e presiza resposta militar, ou presiza resposta ho medida seluk. Ida ne'e primeiru, depois mak ita difini polítika defeza ho seguransa. Ita seidauk iha polítika seguransa ho defeza. Ita iha mehi atu regula operacionalidade militar. Mais operasionál militar atu asegura polítika sira iha Timor. Operasionál militar atu responde ameasa husi interna.

Iha 2015, emá barak sei hanoin hela katak iha operasaun boot iha Laga ho Baucau, Polisia Militar, ne'ebé iha objetivu atu ba halo kapturasaun ba Mauk Moruk ho nia elementu sira.

Infelizmente Mauk Moruk nia elementus lubuk ida mate. Ema preokupa hela ho aktu ida ne'e. I ema barak hanoin katak hahalok ida ne'e loloos labele akontese tanba ne'e viola prinsipiu konstitusional. Nudár PR saida mak ita boot sei halo atu nune'e buat sira be krime ne' e labele akontese tan, labele iha tan Laga 2 labele iha tan Baucau 2?

Iha situasaun lubuk ida mak akontese tanba komunikasaun entre lideres estado la funsiona ho di'ak. Ha'u hanoin tanba ita la hein to'o situasaun ne'e agravadu, aat liu.

Ita kuandu lee ona situasaun ruma komunikasaun presiza para oinsá foti medidas preventivas para la'o tuituir malu, konsektivu, konsistente to'o rohan. Situasaun balun akontese tanba ita minimiza fatór balun ne'ebé maka kondisiona situasaun aat ida atu mosu. Entaun tenke komunika. Kuandu mosu sinál ida ne'e ne mais ou menus nia ba oin ne'e ba iha ne'ebé.

Oke, ita ko'alia kona-ba polítiku ho adversáriu ka, entre lider polítiku. tanba situasaun balun ita hatene maibé ita dala ruma haree dehan simples hela. Ita minimiza ninia impaktu. Ita minimiza ninia forsa destrutiva ba estado tomak.

Tanba ne'e mak medidas preventivas ne'e ita foti antes, maibé kondisiona ho komunikasaun polítika entre lider estado nian.

PR iha situasaun ida ne'e kaer knaar ida atu garante unidade do estado, garante funcionamentu, komunika. Prezidente iha knar nia halo monitor ba situasaun ida nee. Tanba Prezidente nia kompeténsia la barak, uitoan maibé boot. Maibé tenke hatene buat lubuk ida iha estado tomak. Kona-ba seguransa, kona-ba estabilidade, desenvolvimentu umanu, juventude, buat hotu

So komunikasaun ho diálogo hanesan dalan hosi Prezidente Samala Rua atu evita problema?

Alein de evita problema, garante konsolidasaun do estado.

Molok atu hakat ba segment terseiru nian ha'u hakarak fó oportunidade ba maluk sira iha studio atu bele fó pergunta. Ha'u fó oportunidade ba ema na'in rua atu bele fó.

Ato: Di'ak obrigado, ha'u hanoin ha'u husu perguntas mais pratika de'it. Iha ohin moderador temi uitoan kona-ba kazu korrupsaun ha'u hakarak atu temi de'it naran tanba buat ne'e públiku ona ema hotu hatene. Kazu Emilia Pires, ne'e momentu kandidatu sei iha KAK i sai hanesan tensaun uitoan tanba depois involve lideres polítiku boboot sira, lakleur de'it ita rona Emilia la iha tiha ona, ikus mai ita rona dehan Emilia la'ós ona sidadaun Timor. Agora kandidatu rasik haree ida ne'e no atu garante ukun di'ak ida ba oin ne'e hanesan prezidente, saida mak bele halo di'ak liu tan iha area ida ne'e?

Primeiru estado maka, estado no sentidu Governu, Parlamentu mak halo desizaun kria órgaun lubuk ida atu halo check and balance.

KAK eziste atu fó resposta ba sistema ida check and balance. Entaun fó kompeténsia lubuk ida komisaun anti korrupsaun atu halo komisaun i kompeténsia ne'e ne obriga nia tenke atua halo buat ruma. Tanba ne'e mak medidas balun komisaun Anti Korrupsaun foti hasoru membrus governu balun, diretór balun, sidadaun balu, tanba kompeténsia haruka atu halo funsaun ida ne'e.

Funsaun ne'e la'o la'ós tanba ema halo odio vingansa política. Maibé tanba iha evidénsia lubuk ida orienta KAK atu foti medidas. Maibé la'ós KAK derrepente hanoin mak ba buka ministru A Ministru B, Diretór A, Diretór B Funsionáriu tantu,...

Daudaun ne'e PR mós preokupa hela kona-ba kazu ida ne'e. Prezidente dehan Governu tenke lori autór ne'e mai. Ita hatene hela tanba autór ba rai li'ur mós tanba halo knaar estado

nian. tuir informasaun ko'alia hanesan ne'e. Saida mak hanesan Prezidente, Samala Rua sei halo atu buat ne'e labele akontese tan iha futuru?

Reforsa, fó apoiu polítiku ba funsionamentu órgaun estadu inklui KAK. Atu hatete katak Prezidente nudár Chefe do estadu, hola nia knaar ida garante funsionamentu regular institusoens estadu ne'e bele dala ruma sai portavós.

Ko'alia katak órgaun sira ne'ebé mak estadu tau hala'o funsaun, husik hala'o funsaun loloos. Husi parte seluk, Prezidente bele atua hanesan moderador atu modera atakes entre órgaun estadu ne'ebé mak la presiza. Tanba medidas ne'ebé maka instituisaun estadu lubuk ida foti hanesan KAK ne'e medidas legais. Bazeia ba evidénsia, tuir lei permite sira. Maibé asaun komentáriu lubuk ida ne'e polítiku.

Entaun polítiku komentáriu, lei la'o nafatin. Prezidente enkoraja, no enkuantu la kontra lei, PR halo servisu nafatin, enkuantu nia hakarak halo komentáriu polítiku halo ba, mais ida ne'e de'it, utiliza pratika check and balance.

Nia la'ós espesífiku sai husi ita nia sistema. ita nia sistema fahe ona podér ba órgaun lubuk ida. La iha órgaun ida kaer podér tomak. Ezekutivu, lejizlativa, Judikativu, lae. Fahe, Parlamentu Lejislativu halo fiskalizaun, halo desizaun polítiku. Governu ezeutivu. Tribunal Jurídiku. Hala'o nia funsaun. komplementar hela la iha problema.

Problema iha ita nia mentalidade, problema iha ita nia karáker lideransa. Tan ne'e ita hadi'ak karáker lideransa, hadi'ak mentalidade atu entende estadu nia funsionamentu , tuir nia pilares, tuir ninia kompeténsia ne'ebé konstitusional nian fó mai. Presiza komunikaun, atu bele ne'e ne la'o di'ak.

Kandidatu Prezidente Samala Rua, atu asegura Check and Balance, Konstituisaun fó kompeténsia ida ba Prezidente atu bele veto ka promulga Lei. Ema barak preokupa katak veto presidente sei la iha valor. Tanba uainhira fila fali ba iha PN, Parlamentu bele Vota kontra Veto. Ha'u hakarak atu husu ba kandidatu Prezidente, saida mak valor veto ka promulgasaun ne'e tuir ita boot nia oklu rasik?

Veto ne'e Prezidente ejerse ninia funsaun kontrolu jurídiku. Tanba ohin ha'u hatete ne'e, kompeténsia la hela mesak iha fatin ida de'it. Parlamentu halo lei, Prezidente promulga. Halo tiha lei, la promulga, la aplika. Prezidente la promulga buat mamuk ida.

Maibé iha veto ba lei, Prezidente iha situasaun ida ne'ebé ke ladún forte. Tanba nia veto dala ida de'it, tenke justifika ho argumentu no razaun legal lubuk ida ne'ebé forte. Para parlamentu atu hare katak razaun ne'e justifikadu, razaun ne'e fundamental.

Mas se razaun la forte, Parlamentu sei iha justifikasaun para atu bele lori fila fali lei ne'e ba PR, PR tenke promulga. La iha opsaun seluk tan. Dekretu lei Prezidente veto dala ida mate ona. Maibé, mas problema la'ós justifikasaun de'it. Mas iha ne'e maka Prezidente sai guardiaun ba Konstituisaun nian.

Mas Prezidente iha kapasidade ida, la'ós Prezidente mesak maibé ninia gabinete, ninia asesor sira tenke forte atu bele asegura lei ida atu promulga nia tenke intende didi'ak lei ne'e ninia konstitusionalidade, ninia impaktu ba sociedade, ninia sentidu ba estadu tomak tenke iha.

Tanba ne'e mak Prezidente tenke ser iha apoiu ida ne'e. Maibé veto dala ida de'it ba Lei. Ba dekretu lei nia bele veto dala ida mate ona.

Kandidatu Prezidente ita foin hetan sms ida. Pergunta ida husi ita nia telespetadores. Nia husu hela hanesan ne'e. Karik maun samala rua eleitu, sá política ida maka ita boot sei foti

***hodi koordena ho ministériu kompetente sira, atu bele fó protesau ba iha produ tu rai laran?
Katak atu ajuda katak labele iha dominasaun ekonomia husi rai li'ur?***

PR nia komunikasaun diretu ba ministru sira ne'e liu husi PM. Agora Ministru sira ne'e subordinadu husi PM. .

Agora presiza governu halo definisaun ida ba polítika investimentu polítika ida ke relaciona ho kondisaun timor leste nian. Ita haree ita nia estrutura merkadu, iha Timor-Leste ne'e ne, ita nia importasaun boot liu. Ita la iha produ tu ida ne'ebé maka iha, so iha Kafé mak produ tu ida ita halo esportasaun boot ho reseita segunda alein de mina.

Maibé sira seluk la iha. Ne la'ós signifika potensia la iha. Potensia ekonómiku timor iha. Presiza polítika atu dezenvolve potensia ekonómika ida ne'e.

Ita dala ruma ko'alia kona-ba ema husi estranjeiru hakarak sosa produ tu ida ne'e. porezemplu kami. Balun dehan maek mós ema sosa. Mas se mak iha Timor ne'e kuda kami. Se mak iha Timor ne'e kuda maek, La iha ema mak atu halo plantasaun ba buat sira ne'e.

Timor-Leste nia ekonomia maioria parte ne'e depende ba mina-rai. Mina rai mós besik ona atu maran. Kampu balun maran tiha ona i kampu seluk hein tan tinan tolu ka tinan haat. Saida mak Prezidente Samala rua sei hanoin ka sujere ba governu katak setór saida mak tenke hetan atensaun atu bele ajuda ekonomia timor bainhira mina maran?

Iha dono dono (setór barak) setór ...tenke iha buat rua maka seidauk hetan atensaun, dezenvolvimentu agrikultura ho turizmu. Potensia rua ne'e ne iha da'et ba malu hela.

Ita ko'alia kona-ba agrikultura ita iha ligasaun ho natureza, ligasaun ho buat lubuk ida iha rai. Turizmu liga ho buat lubuk ida iha ita nia rai. Ita nia dezenvolvimentu ekonómiku, ita nia nesesidade ema, lubuk ida ita foti husi produ tu natureza ninian. Ai moris, be rai, ár, anin, buat sira ne'e mai husi natureza.

Agora dezenvolvimentu ekonomia mós uza hela sasán lubuk ida nee. Agora presiza oinsá mak governu fó atensaun ba setór ne'ebé maka iha potensia ekonómiku ne'e hetan atensaun boot liu.

Mina rai, halo, konsege fó osan, maibé kondisaun mina rai la'ós renovavel. Ita embarka hamutuk ho agenda global kona-ba objetivus dezenvolvimentu sustentável. Objetivus dos dezenvolvimentu sustentável ninia natureza atu garante katak dezenvolvimentu la afeta destrusaun ba buat lubuk ida mak fornese dezenvolvimentu ekonómiku mai husi natureza.

Buat ne'e ninia estragus para afeta jersaun ne'ebé tuir mai, la ejerse sira nia direitu atu uza buat sira ne'e.

Uluk nana'in presiza uluk atu iha polítika atu bele garante katak dezenvolvimentu sustentável ninia baze liga ho buat lubuk ida ho natureza ne'e ne hetan atensaun maka'as husi estadu tomak. Estadu signifika, parlamentu halo lei liga ho dezenvolvimentu lubuk ida. Governu ezekuta lei ida ne'e tau atensaun tuir saida mak estadu konkorda liu husi lei ida ne'e. Liu husi polítika ida ne'ebé estadu disidi atu halo para atu fó vantajen dezenvolvimentu ne'e ne iha continuidade husi jersaun ba jersaun.

Interesante tebes atu ko'alia kona-ba dezenvolvimentu sustentável. Daudauk ne' e ita iha projetu boot ida iha tasi mane ne'ebé sei presiza osan biliaun ba biliaun dolar amerikanu. La'ó Hamutuk rasik hanoin katak projetu ida ne'e sei fakar osan. Iha ekonomista barak hanoin katak projetu ida ne'e dala ruma sei la fó retornu. Ita hatene katak se timor leste adopta prinsipiu dezenvolvimentu sustentável, projetu ida ne'e sees husi prinsipiu ida ne'e tanba nia sei uza mina-rai ne'ebé labele konsidera hanesan enerjia sustentável ida. Nudár PR

saida mak ita-boot sei halo atu hatuur katak dezenvolvimentu ida loloos ne'e mak ida sustentável ne'e. Saida mak ita boot haree kona-ba projetu tasi mane ne'e rasik?

Primeiru, PR nudár chefe estado atu garante órgaun estado sira ne'e la'o ba objetivu estado ninian. Objetivu estado hatete katak dezenvolvimentu presiza atinje bein star ema, material no espirituál. Labele kebra justisa sosiál no labele kebra natureza no meu ambiente.

Agora, Prezidente la ezekuta. maibé Prezidente bolu atensaun ba estado tomak hosi aspetu jurídiku, hosi aspetu polítiku presiza fó atensaun ba primeiru: definisun política ita nian ba aspetu ekonómiku tenke ser orienta ba objetivu estado nian ne'ebé hatete katak, retribuissauun merata (iguál) husi rekursus estado nian ba territóriu tomak.

Agora ita halo dezenvolvimentu ida ne'ebé mak ninia impaktu la direitu tempu naruk, bele akontese, maibé ema nia neseseidade ne'e atuál. neseseidade báziku sidadaun ne'e ne atuál. La'ós aban mak presiza be, bainrua mak presiza hahán, presiza saúde. Agora neseseidade sempre atuál, neseseidade nunca futuru. futuru ne'e espetativa, futuru ne'e ita ninia objetivu.

Presiza responde uluk neseseidade atuál ne'e para ema partisipa dezenvolvimentu ba setór selseluk. Povu mak ser na'in ba estado. Povu tenke sente estado ne'e di'ak, enkuantu estado kria kondisoos para nia mós bele partisipa.

Dalan iha para atu responde ba neseseidade báziku povu ninian. Neseseidade báziku povu ninian ne'e buat ida ke la dun todan ema presiza be, presiza osan, ho servisu ne'ebé di'ak para nia bele sustenta nia moris rasik, Presiza Saúde, asesu be mós, edukasaun, estabilidade seguransa.

Agora ita halo dezenvolvimentu infraestrutura buat boot, kustu boot. Ita hanoin katak nia sei fó retornu iha futuru. Retornu sei iha futuru, retornu la'ós agora. mais neseseidade báziku tenke halo agora. Gasta tiha ona balun. Prontu buat balun halo tiha ona, estado ne'e sempre. Ita para mós estado gasta ona. Maibé muda atensaun. Muda atensaun, mai ha'u Prezidente muda atensaun modelu ba neseseidade báziku nian.

Iha Oe-Cusse povu presiza saida, iha tasi mane povu presiza saida, Timor laran tomak ema presiza saida uluk? Presiza neseseidade báziku uluk tanba ne'e garante mós estabilidade, garante mós seguransa garante mós partisipasaun política demokrátiku iha povu ne'e.

Projetu Zona Espesiál iha Oecusse, Tasi Mane, iha projetu barak ne'ebé atu besik povu, públiku ladún asesu ba informasaun sira ne'ebé iha. I la iha órgaun ida ne'ebé ajuda públiku atu hatene informasaun sira kona-ba povu nia osan, mekanizmu foti desizaun sira. Kazu Oe-Cusse, kazu Suai, barak akontese. Nudár PR, saida mak ita boot sei halo atu ajuda katak povu sira Oe-Cusse, povu sira iha Suai, Povu sira iha Tutuala, iha Maubisse, iha fatin barak, Bele asesu ba informasaun hirak ne'e. Atu sira bele iha informasaun adekuadu ba sira?

Governu iha Ministériu lubuk ida, sira nia servisu iha sanak prioridades. Ministériu justisa iha diresaun ida ko'alia kona-ba sidadaun nia direitus umanus sira. Estrutura governasaun ne'e, sai nafatin baze. liga ho autoridades komunitária, comunidade sira, Chefe suco sira. Presiza utiliza ho didi'ak mekanizmu estruturál ida ne'e.

Maibé husi parte ida PR nia knaar ida ohin ita dehan garante funksionamentu regular ne'e ne, signifika atu bolu atensaun nafatin ba governu ka utiliza estrutura ne'e ne la'ós hala'o funsaun chefes de'it maibé hala'o formasaun, funsaun informativu. Komunika kada desizaun política ida ohin ita dehan ne'e, iha ligasaun ho interese públiku. Iha ligasaun povu ninia moris, presiza komunika ba povu. Parte seluk, estado mós moris ho estrutura ida hanesan ne'e.

Iha sosiedade sivíl, iha media, asosiasaun lubuk ida. Uza papél, uza rede sira ne'e para bele atu transmite informasaun ba públiku ne'ebé iha ne'e Prezidente la'ós de'it dehan preokupa de'it ho pilares do estado. Mas preokupa mós ho organizasaun lubuk ida ne'ebé eziste entre sidadaun ho

sosiedade sivil, media, asosiasaun lubuk ida. Ita Timor, sosiedade ida ke ema tama iha organizasaun lubuk ida, ita kria organizasaun lubuk ida, ema ida pertensia ba organizasaun tolu haat lima.

Kandidatu Prezidente ita foin hetan tan pergunta balun hosi telespetadores. sira husu, bainhira ita sai hanesan Prezidente, saida mak ita-boot sei halo atu bele ajuda katak nepotisme labele buras iha Timor. Tanba sira sente katak Nepotisme dala barak hafraku kapasidade sira seluk atu bele kontribui ba estadu. saida mak ita boot sei halo bainhira eleitu hanesan Prezidente?

Reforsa kbiit check and balance. Ita iha PDHJ, ita iha Tribunal de kontas, ita iha ispetor jerál, Iha ispetor ministériu ida idak ninian, iha KAK, iha komisaun funsaun Públika, Órgaun sira ne'e eziste atu bele garante Check and Balance. Husik sira fungsional ho di'ak.

Mai ha'u presiza suporta sira nia funsionamentu. Presiza bolu atensaun para sira bele halo funsaun didi'ak. Nepotismo akontese porque ema la ezekuta nia funsaun loloos. Funsauun públiku. Porezemplu, komisaun PDHJ, nia knaar ida mak atu hare ba boa governasaun.

Boa Governasaun mós kontra buat ida Nepotisme. Atu hamenus Nepotisme presiza haforsa instituisaun sira ne'e ninia funsionamentu. Sira nia papél atu bele halo check and balance. Se mak kria? estadu mak kria. Estadu mak kria para husik sira la funsiona tuir lei haruka, entaun taka tiha. Tanba tau mós sira nia funsionamentu pois funsiona la tuir dalan

Ne'e la'ós nepotisme maibé ema bolu dehan pratika injustisa. Daudauk ne'e ita hatene ekonomia timor, ekonomia formal labele absolve ema hotu para atu hetan benefísiu ka partisipa. Ita nia maluk barak mak hatutan sira nia moris liu husi halo kreatividade involve negósiu ki'ik. Negosiante ambulante. Infelizmente estadu ne'ebé iha podér hela uza lei hanesan lei ba orden públiku, dekretu lei ba orden públiku ijene hodi bandu sira hodi labele fa'an iha fatin públiku. Besik la iha polítiku sira iha timor ne'ebé mak representa sira. Ha'u seidauk hare kona-ba PR ka PM ko'alia kona-ba ida ne'e, ka deputadu sira atu ko'alia ba interese tiga roda sira. Karik eleitu hanesan PR saida mak Samala Rua sei halo atu bele aseguira sira nia direitu, direitu ema ki'ik sira atu asesu ba ekonomia ne'ebé di'ak?

Dezenvolvimentu ekonómiku bele mosu mós hosi kreatividade sidadaun ida idak ninian atu espresa sira nia kapasidade halo negósiu ki'ik baibain. Agora iniciativa sira ne'e mak presiza hetan resposta pozitivu husi autoridade sira. Agora kestaun ijene iha razaun maibé sira ninia asaun ka sira ninia atividade negósiu ki'ik ne'e afeta duni ijene, afeta duni limpeza iha públiku jerál.

Mais se sira la halo sira mós bele hamlaha iha uma? Oinsá atu bele hare ba ida ne'e?

Tanba hanesan ne'e. Iniciativa ekonomia ne'e nakloke. ita nia sistema ne'e la'ós dehan merkadu emprezarial de'it maibé iha mós possibilidade ema atu merkadu tradisionál komunitária. Ema bele iha iniciativa sira ne'e. Enkuantu iniciativa ne'e la afeta seguransa estadu, la afeta estabilidade, la afeta orden publika, Estadu presiza fó apoiu.

Agora situaun balun la'o iha Dili laran ne'e ne, mai ha'u seidauk hatudu afeta limpeza. Porezemplu iha Lesidere, ema fa'an, ne'e lojistikamente fatin lixu mak laiha. Ne'ebé la bele foti razaun ida atu impede iniativu sira ne'ebé maka mai husi comunidade. Komunitade halo para dezenvolve ninia kapasidade ekonómika hodi sustenta ninia nesiedade. Ne'ebé ida ne'ebé mak importante liu, ema sustenta ninia nesiedade ho iniciativa.

Ema ida haruka hela pergunta mai iha ne'e katak bainhira estadu haree povu ne'e hanesan problema ne'e fó fatin ba dominasaun merkadu husi rai li'ur tanba ita hatene katak fo'er ne'e la'ós de'it tiga roda sira mak fakar. Maluk sira hosi nasaun viziñu mós sira nia dominasaun, tiga roda sira, sira ne'ebé mai fa'an iha estrada ibun. Ne'ebé kuandu sira ne'ebé husi rai li'ur

mak domina, ne'e mós bele estraga, saida mak hanesan PR halo, atu ajuda katak estadu ne'e labele mamar ka di'ak ba ida ne'ebé iha kapitál boot hodi diskrimina ida ne'ebé iha kapitál ki'ik?

Prontu Prezidente nia xefe estadu, nia atua direktamente ho órgaun pilares lubuk ida. Iha kestaun ida ne'e porezemplu, husu responsabilidade ba governu, para governu mak órgaun ezekutivu ida liga direktamente ho mudansas lubuk ida iha povu nia moris. Prezidente nia funsaun haat ohin ha'u temi ne'e, ne'e nia tenke la'o tuir iha kontekstu funsaun haat ne'e nian.

Mais la signifika katak husik hela situasaun sira ne'e. Tanba ne'e mak primeiru komunika uluk. Komunika uluk ho órgaun responsavel. Se situasaun ida ne'e responsabilidade governu, ko'alia ho governu atu tau matan. Se situasaun ida ne'e mak iha ligasaun ho kompeténsia Parlamentu, komunika ho Parlamentu. Mais Prezidente tenke intende. Tenke rona ida ne'e. Atuasaun loloos ne'e mai husi órgaun kompetente ne'ebé mak iha knaar atu haree ba situasaun sira hanesan ne'e.

Investimentu husi rai li'ur ne'e presiza. Maibé estadu tenke kria kondisoos lubuk ida para labele afeta ita nia situasaun balun ne'ebé mak destroy ita nia poténsia ekonómiku. Kestaun balun ohin dehan limpeza.

Buat ida mak ne'e. Liga ho produsu hirak ne'ebé mak too ikus ema tenke falun ho plastiku. Plastiku lubuk ida labele at uainhira iha rai, susar atu at lalais, ida ne'e afeta kondisaun rai. Iha ita nia situasaun atuál ne'e ne produ tu lubuk ida tenke falun ho plastiku i plastiku ne'e rasik iha Timor seidak iha prosesu recycling ne'ebé mak di'ak para atu bele garante katak nia afeta fali ita nia kondisaun ambiente nian

Kandidatu Prezidente, daudauk ne'e Timor-Leste iha prosesu hela atu sai membru ba ASEAN. Ema preokupa barak kona-ba implikasaun barak husi ASEAN. Nudár PR, saida mak ita-boot nia polítika atu asegura katak Timor-Leste, maske tama iha comunidade ASEAN labele hetan implikasaun negativu, atu bele ajuda katak atu sai membru ASEAN ne'e ne la'ós kria Timor hanesan merkadu maibé halo Timor Leste atu hetan benefísiu, saida mak ita-boot nia hanoin ba asuntu ne'e?

ASEAN chapter ne'e temi ninia objetivus lubuk ida kona-ba mekanizmu ASEAN ninian. Buat lubuk ida liga ho polítika seguransa, estabilidade, sósiu kulturál no dezenvolvimentu ekonómiku. Ita iha situasaun lubuk ida ne'ebé mak ladún todan ba ita. Mais kona-ba asuntu ekonómiku, todan mai ita. Tanba kuandu ita pertensia ba ASEAN, ita atu tama ASEAN la'ós dehan foin de'it. Ita husu adezaun ba ASEAN iha 2002 ba 2009. Agora ASEAN mak disidi.

Mas molok sira disidi, sira tenke avalia ita nia situasaun lubuk ida ne'ebé mak konforma an ho objetivus sosiais, seguransa, estabilidade, sósiu kulturál, ekonómiku. Agora ita nia kondisaun permite atu ita bele kompete tama ASEAN. Kuandu tama ASEAN ona, ita nia dinamiku ekonómiku ne'e ne país seluk bele mai investe ho kapasidade infrastrutura ida ne'ebé mak naton, ho rekursus umanus ne'ebé mak naton para ita la'ós kompete, ita labele sai objetu kompetisaun mais ita sai autór atu bele kompete hotu ba. Situasaun lubuk ida iha aspetu ekonómiku seidak permite. Ita nia infrastrutura seidak naton para atu bele permite atividade ekonómiku.

Ita nia rekursus, ita nia emperezariu lubuk ida seidak bele ba kompete. Ita nia emperezariu lubuk ida depende ba estadu, projetu. Mas ema ninia emperezariu lubuk ida ema independente, autonomu, ekonomikamente ho kapasidade di'ak.

Agora vantajen negósiu ekonómiku ita seidak bele kompete ho sira. Presiza kria uluk kondisaun ida di'ak. Governu kria uluk kondisaun ida ke di'ak. Ita tama ASEAN ita nia kapasidade kompetitivu iha aspetu ekonómiku ne'e la monu. Labele Ki'ik. Ita tenke kompleta uluk kapasidade lubuk ida. Ida ne'e ita tenke kria uluk.

Razaun la'ós tama la di'ak, tama mas ita kapás ita bele atu halo konforma an ho prinsipiu ne'ebé maka ASEAN tula tiha ona ka lae. Segundu, ita la'ós agora la'ós ita mak disidi. ASEAN mak disidi. Sira halo desizaun depende ba ita nia situasaun ida i desizaun tenke konsensus. Membrus hotu apoiu para ita atu tama. Mas sira konkorda bazeia ba kapasidade lubuk ida ne'ebé mak bele responde ba ASEAN ninia prinsipiu sira.

Samala Rua hanoin katak Timor tenke prepara an lai molok tama ASEAN loos?

Tenke prepara an duni. Ita la prepara an ita la hetan vantajen sai membru mas ita sei sofre se ita nia dezenvolvimentu ekonómiku la fó benefísiu ba ita mais fó benefísiu ba ema seluk.